

Santiago de Compostela, 28-II-1954

Sr. D.
Luis Seoane
BUENOS AIRES


Querido Luis: Recibín a tua carta de data 10 de febreiro, que penso contestar moi en breve e longamente. Agora trátase de un asunto moi importante no que é imprescindible a vía confidencial. E por iso ~~por~~ aproveito o viaxe da Dona de Bouza-Brey, que leva a carta en mán.

Veleiquí o problema. En España, e na barafúnda de publicacións oficiais ou semioficiais ó servizo do réxime, hai unha soia totalmente autónoma e de grande honestidade. Chámase INSULA, non séi si tí terás visto algún número d-ela. A trancas e barrancas, loitando con moitas dificultades, vai saíndo adiante. Hoxe tén no país un prestixio fantástico e véndese por miles e miles de exemplares. Un dos últimos números estivo adicado íntegro ás letras catalás. Tivo unha resoancia extraordinaria e tal ímpetu que nin as autoridades se atreveron connél. Pois bén, a nós ocurriúsenos que se podería elaborar outro número adicado por comprobante a Galicia. O Director da Revista -Enrique Canito- é amigo méu. Púxenme á fala con él e aceptou a nosa proposta. Desde logo, fiándose na seriedade intelectual de Galaxia. Xa temos estudado un anteproyecto e coidamos que podemos facer algo extraordinario. Teimamos dar unha visión total e verdadeira da forza, puxanza creadora e auténtica orixinalidade da cultura galega actual. As xestións levámolas no maior secreto pra que cando a Revista apareza seña como unha verdadeira bomba na estulticia e modorra do país. Agora ben, precísanse anuncios das editoriais de libros galegos. Eiquí creo que contamos con todas. Mais era moi importante adicar unha plana enteira ás actividades editoriais do Centro Gallego e media ou cuarta páxina ás que Cuadrado e tí levades feito. O importe da páxina enteira (tén en conta que a revista tén un tamaño semellante ó de un periódico) custa 2.000 (duas mil) pesetas; media páxina, 1.300 (mil trescentas), e un cuarto de páxina, 600 (seiscentas). Como véis, son precios moi razoables, dada a enorme difusión da Revista e a dimensión das páxinas.

O que nós pretendemos é que o Centro Gallego se comprometa a abonar o anuncio d-eles e mail-o voso, e que señas tí o encargado de lles facer ver a importancia de todo orde que isto tén. Ven ser o espaldarazo en toda España do aspecto cultural dos galegos en Bós Aires, ou seña, do Centro Gallego, que en realidade eres tí, e de NOVA, "Botella al Mar", etc., que felizmente tamén eres tí. Nas tuas máns, pois, deixamos esta misión. Aitúa como millor comprendas que debe facerse. Importa a rapidez, pois a cousa urxe. Que teñan en conta que Galaxia, sin un real na caixa, vai pagar un anuncio de páxina enteira. Cando me contestes, por correo aéreo, fálamе somentes de unha maneira moi vaga e do xeito que tí vexas máis engañoso pra a Censura, que cada día ~~xxx~~ fáise máis dura e máis estreita.

Si non conseguiras o anuncio voso, non te preocupes demasiado. Vós sairedes na Revista, pase o que pase. É preciso que me envíes unha lista completa de todol-os libros que vós levades publicados, diversas coleccións, etc.

Recibe unha forte aperta de,

A handwritten signature in dark ink, appearing to be 'Antonio', written in a cursive style with a long horizontal flourish underneath.

Van co-ista carta dous artigos publicados no número extraordinario de Fin de Ano da "Noite", e que tiveron bastante éxito. O da "Ciencia" tén, como podes ver, unha intención condenada e pasou pol-a censura inexplicablemente. A xente captou moi ben o ferrete e fíoi moi comentado.

Na próxima carta, enviaréiche o artigo pra La Nación.

Saúdos pra Lorenzo e Rafael.

Queremos que ~~xxxxx xxxxxxxx~~ páxina do Centro Gallego veña arranxada e disposta por tí, e pol-o tanto sería moi conveniente pra nós que a enmarcases ou decorases según estimes millor. Todo dibuxo teu caerá ben na Revista. Incluímos un número de INSULA, por si non-a conoces, pra que te fagas unha idea das dimensións e do tono da mesma.